

17/01/1998

Mutu barang tempatan tinggi

ALOR STAR, Jumaat - Datuk Seri Dr Mahathir Mohamad meminta rakyat mengikis tanggapan kononnya mutu barangan buatan Malaysia tidak setanding dengan barangan buatan luar negara.

Perdana Menteri berkata, sikap tidak yakin terhadap barangan tempatan dan suka membeli barangan buatan luar negara adalah antara punca yang menjejaskan ekonomi negara.

Menurutnya, jika rakyat berhati-hati, berjimat, bijak berbelanja dan mengutamakan barang buatan tempatan, ekonomi negara akan pulih lebih cepat.

"Mutu barangan tempatan tidak lagi seperti dulu sehingga banyak barangan dijual di negara maju sebenarnya dibuat di negara kita.

"Kerap kali rakyat tempatan yang membeli-belah pada harga mahal di luar negara terkejut apabila mendapati barang yang dibeli itu adalah buatan Malaysia.

"Ini bermakna barangan buatan Malaysia diiktiraf dan bermutu tinggi. Malangnya, rakyat tidak yakin dengan barangan buatan Malaysia," katanya merasmikan kompleks beli-belah Star Parade di sini, hari ini.

Perdana Menteri juga menegaskan, kerajaan sudah berusaha memajukan negara dan semua pihak mengaku tidak melakukan kesalahan sehingga menjejaskan ekonomi.

"Tetapi ada dakwaan kononnya penyakit ekonomi ini berjangkit daripada jiran kita. Kononnya mereka (jiran) hadapi masalah... sakit, kita juga dapat jangkit. Sebenarnya bukan jangkit.

"Sebenarnya ada cara bagi mereka kurangkan pendapatan kita, iaitu dengan menjatuhkan nilai ringgit dan harap kita jadi miskin dan dengan itu kemajuan kita akan tersekat.

"Tetapi, walaupun tersekat dan terpaksa perlahankan pembangunan negara, kita masih mampu. Justeru, jika rakyat berhati-hati, jimat cermat, beli-belah secara bijak dan utamakan barang tempatan kita akan dapat atasi masalah yang dihadapi sekarang," katanya.

Dr Mahathir juga berkata, rakyat akan hidup sempurna dan maju jika tabah dan sabar menghadapi rintangan yang menghalang pembangunan dan kemajuan negara.

Katanya, cabaran dan halangan yang ditimbulkan pihak lain dapat diatasi jika semua pihak berusaha secara lebih tekun, sekali gus menjadikan negara dan bangsa yang lebih maju.

(END)